

四庫全書

集部

欽定四庫全書

集部

明詩綜卷三十六

詳校官中書臣涂日煥

主事銜臣徐以坤覆勘

總校官降調編修臣倉聖脉

校對官庶吉士臣潘魯起

謄錄監生臣楊恪

欽定四庫全書

明詩綜卷三十六

翰林院檢討朱彝尊編

徐禎卿

五十首

禎卿字昌穀一字昌國吳縣人弘治乙丑進士

除大理寺左寺副降國子監博士有迪功集又

有歎歎焦桐鸚鵡花間野興自慙等集

李獻吉云昌穀

諸詩溫雅以發情微婉以諷事爽暢以達其氣
比興以測其義蒼古以蓄其詞擬義以一其格

悲鳴以泄其不平參伍以錯其變即有蹊徑厥儷鮮已顧華玉云昌穀專門詩學究訂體裁

上探騷雅下括高岑融會折衷備茲文質取充棟之草刪存百一至今海內奉如圭璧所謂雖多亦奚以為也獻吉乃云守而未化故蹊徑存焉豈其然歟又云弘治間詩學始盛獻吉仲默昌穀各有所長李氣雄何才逸徐情深皆準則古文鍛琢成體鄭繼之云昌穀年二十外厭薄吳聲一變遂與漢魏盛唐作者馳騁上下今之世絕無而僅有者也年三十選平生所為文曰迪功集今行於洛陽者獻吉多為更定失昌穀真蓋獻吉雖與同調其丰神氣魄自有不相能者矣文徵仲云昌穀古體合作近體非所好而為之軌工皇甫子浚云李何矯一時之獎為中興之冠而不能不泥其跡故仲氏子安於詩獨取迪功皇甫子安云徐君繼軌二晉

標冠一代又云會諸氏之長以退六代迪功其
庶幾乎皇甫子循云弘德之間李何諸子退
述大雅取裁風人一時藝林作者響臻同好景
附咸足馳騁海內而徐君亦高步江左獨綜菁
英莫可瑕類非其佳穢自得去取過嚴乎王
元美云徐昌穀如白雲自流山泉冷然殘雪在
地掩映新月又如飛天仙人偶游下界不染塵
俗又云昌穀如六翮搏風三危吸露快爽種種
不可名狀又云昌穀少即摘詞文匠齊梁詩沿
晚季迨見獻吉始大悔改其樂府選體歌行絕
句咀六朝之精音采唐初之妙則天才高朗英
英獨照律體微垂整栗亦浩然太白之遺昌穀
之於詩也黃鵲之於鳥瓊瑤之於石松桂之於
木也又云昌穀自選迪功集咸自精美無復可
憾其五集係少年時語舞陽絳灌貴後向人稱
其屠狗吹簫為佳事寧不泚頰又云絕塵行空

吾推昌穀然不能諱其輕又云吳中如徐昌穀
詩祝希哲書沈啓南畫足稱三絕王敬美云
詩有必不能廢者雖衆體未備而獨擅一家之
長如孟浩然洮洮易盡止以五言雋永千載並
稱王孟我明其徐昌穀高子業乎二君詩大不
同而皆巧於用短徐能以高韻勝有蟬蛻軒舉
之風高能以深情勝有秋閨怨婦之態更千百
年李何尚有廢興二君必無絕響歐楨伯云
博士洗盡蕪辭天然妙麗金源人詩清廟瑟三
歎齋房芝九莖庶幾似之項子長云昌國華
而不靡質而不俚深而不晦壯而不怒約而精
騁而中節宜其崛起江南雄視中土顧玄言
云迪功豪縱英裁格高調雅馳騁漢唐之間婉
而有味渾而有迹獨悲夫長轡既驟窮途忽蹶
顧未盡肆力耳黃清甫云迪功取模古調用
鑄今詞工逾嘔心妙幾換骨力振東吳之靡爭

長北郡之雄雖卷帙寂寥而篇章簡鍊至降格
為律用思尤深開元以下難與為儔恨其早殞
未究厥志 胡元瑞云弘正間詩流特衆然皆
近逐李何士選升之近夫獻吉派也華玉君采
望之仲鵠仲默派也昌穀雖服膺獻吉然絕自
名家遂成鼎足獻吉譏其大而末化蹊徑存焉
何元朗謂獻吉詩比之昌穀蹊徑尤甚王長公
謂昌穀所未至者大也非化也世以何王為篤
論 王伯穀云弘正間詩流輩出李君亦幟於
闕西徐子白眉於東海李資弘亮徐學精深長
才絕力則徐不逮李古色清聲則李不逮徐臨
草昧之頃難少李君今全盛之時當多徐子
穆敬甫云徐詩如皋蘭猗靡脩竹嫋媚足稱雅
致宜與李何方駕 蔣仲舒云昌穀詩韻本清
華調復古秀雖何李亡易也 傅伯俊云先生
奪赤幟於北地信陽之間鼎足而居其詩憲章

三百律襲漢魏濯被六朝蹈詣天寶外集多稱
年綺語尚沿吳習猥以名重槩傳而不知瑕瑜
不類也 陳卧子云迪功有詩無多乃與二雄
鼎足觀其談藝皆深造之言宜其短章片語無
不連城也又云昌穀似與仲默同源然仲默俊
逸昌穀矜貴又自有殊 宋轅文云昌穀如秋
夜銀河爛爛垂地又云何李刻意少陵迪功獨
宗太白神到之作自成一家不若嘉靖七子同
派也 李舒章云迪功神致俊爽如天廡飛龍
不加鞭策自然駛邁用寡用虛獨有所長 王
貽上云明弘治間李何崛起中州吳有昌穀為
之羽翼相與力追古作一變宣正以來流易之
習明音之盛遂與開元大厯同風 周青士云
李何專主學杜昌穀兼師盛唐諸家此後薛君
采蔣子雲王穉欽高子業華子潛皇甫昆弟皆
清婉成音各極其致雖非昌穀流派而風調實

自昌穀啓之 沈山子云吳中詩派自高李迪
倡之風華整麗克兼唐宋元人之長其後劉昌
謨輩漸流入姚冶吳源博王濟之返之於理遂
類宋詩沈啓南能以澹宕出之尤為拔俗顧陳
海士選明詩竟遺之以其調近於宋也昌穀既
見獻吉悔其少作然所操仍是吳音第洗除少
日浮豔字句歸於六代三唐而已未嘗北
學於獻吉獻吉譏其蹊徑未化職此故歟
靜志居詩話迪功少學六朝其所著五集類靡
靡之音及見北地初猶強賦詩云我雖甘為
李左車身未交鋒心未服顧予多見不知量此
項未肯下頗牧既而心傾意寓營壘旌旗忽馬
一變是時李何並陳未決雌雄迪功精銳無多
能以偏師取勝遂成鼎足其詩不專學太白而
髣髴近之七言勝於五言絕句尤勝諸體興慶
池頭送君南下等作雖龍標太白復生何多讓

焉又云人所應有盡有人所應無盡無大復是也人所應有盡有人所應無不必盡無空同是也人所應有不盡有人所應無盡無迪功是也三雄真鼎足哉又云樊少南與康德涵論詩而曰初唐詩如春園草木雜生未放之花含蓄渾厚生意勃勃盛唐則淘洗鉅治條理可觀生意稍薄矣近日名家冠絕海內自許古人之上或失之獮者稜角峭厲而乏溫柔敦厚之旨或失之易者流麗光澤而少含蓄渾成之趣所以然者孜孜於杜未嘗引而上之也陳約之為高子業作序而曰子美有振古之才故雜陳漢晉之辭而出入正變初唐襲隋梁之後是以風神初振而縛靡未刊今無其才而習其變則其聲猶厲而畔規不得其神而舉其辭則其聲聞緩而無當彼我異觀豈不更相笑邪繹兩公之言若與北地信陽均未愜意然則李何至嘉靖初聲

猷漸歇作者已有違言惟昌穀莫有訾之者麟
洲稱李何有廢興徐高必無絕響其知言之選
乎

雜謠 二首

夫為虜妻為囚少婦出門走道逢耶孃不敢收東市街

西市街黃符下使者來狗鯁鯁雞鳴飛上屋風吹門前

草肅肅

陳卧子云此紀正
德五年八月之變

壞我民居田樹子桐與櫟桐櫟何青青素車不得下

李舒

章云謠語

極蒼茫

鷓鴣行

白鷓捉黃雀斜盤下九天豈知南山側復有虞人弦一
發中雙翼忽斃青雲端行人皆撫掌仰視落飛翰弓矢
懸馬頭少年坐雕鞍持歸咸陽市百鳥爭聚觀美酒白

玉缸肉腊黃金槃樂哉今日宴四座俱萬年

黃清甫云
鷓鴣一篇

足以上抗西京下視子

建殆千載之希聲也

白紵歌 二首

三星爍爍花滿堂素腕盈盈出洞房垂羅映縠耀明妝

皦若雲中開月光流情盼君君莫忘停歌節舞進玉觴
願君安坐夜未央

旨酒千壺列東廂美人如花嬌北堂高歌合舞聖世昌
願得歡娛永未央脂車秣馬且踟躕百年之會忽須臾
東流之水西飛鳥今我不樂何為乎

詩話樂府宜以求似似之讀
此益見滄溟坳古人之非

古意

空為郢中客不見郢中吟美人高堂上自奏山水音帝

子葬何處瀟湘雲正深寂寥誰共賞江上獨傷心

宋轅
丈云

清婉有

古風

倡家詠效何遜

簾櫳秋未晚花霧夕偏佳暗牖通新燭虛堂響落釵浙

浙烏棲樹明明月墮懷相思不可見蘭生故繞階

鍾廣
漢云

此昌穀少作置之玉
臺集中其誰能辨

舟懷

詩話舟懷以下三
詩絕似青丘生

天曠多樹林日赤溪路永我行一何勞窈窕坼川嶺湍
流好石鬪沙礫與舟鯁行行指前樓望望不得逞火雲
漸暖滅蟬鳴空山靜奄忽青松間了了挂員景一與幽
賞遇遂使煩慮屏先書謝廬僧為埽香爐頂

留別都城諸同志

對酒忽不樂悵然懷別離別離結中勞眷彼長路歧
苒苒郊河樹曖曖關門祠佇望瀟湘水先與秋風期
鴻鴈雲中來數數使人悲懷哉爾方集恨矣予當辭

吳江橋亭遊眺

郡右多麗山湖南富鮮水溶溶蒼樹浮潏潏白煙起中
土屹哀城重波泛人市出郭接修梁垂穹貫遙汜上有
臨流溝高風衍清祀百匯引虛明諸州拆表裏隱約雲
中檣紛紜隰間耔宵澄月色闊風遠漁歌靡空睇眇不
極瑤甃盪餘滓悟彼扁舟人傷此塵代子

送熊士選侍御

壯士樂長征門前邊馬鳴春風三月柳吹暗大同城蘆

溝橋下東流水故人一樽情未已
遙天飛盡隴頭雲唯見居庸暮
山紫羨君鞍馬速流星予亦孤帆
下洞庭塞北荆南心萬里佩刀長
揖向都亭

寄顧華玉

去歲君為薊門客燕山雪暗秦雲
白馬上相逢脫紫貂朝回沽酒城南
陌燕山此日雪紛紛祇見秦雲不見
君胡天白鴈南飛盡千里相思那得
聞

朱子蓉云源本太白去歲何時君別

妾一篇而不覺其摹擬之迹可謂善學古人

青門歌送吳郎

吳郎醉嗜長安酒落魄自言為客久走馬頻看上苑花
回鞭幾折青門柳青門瞳瞳魚鑰開乳燕游絲相逐來
柳下雕鞍留別袂花間酒殘覆蒼苔浮雲去去辭城闕
芳草連天那可歇野店春風聽早鶯關河曉樹懸新月
千里淮流雙畫橈廣陵驛前逢暮潮落日歸帆揚子渡
青山家對伯通橋吾家流水原非隔宛轉胥臺通巷陌
草長難尋仲蔚居林深不辨陶潛宅清溪屋下可垂綸

復有萼羹足獻親君歸儻食水絲膾為念羈棲塞北人

陳卧子云
似勝李頗

贈王淵之

十月狂風吹白雪長安城中地欲裂朱門酒壚紅炙天
空裏瑠花旋消滅由來都國盛繁華青雲絡繹滿仙車
浪說黃金賜寒士爭言白璧謁侯家驕矜意氣遙相羨
片善朝推蒙夕薦待詔虛沈金馬門傳宣直上麒麟殿
王郎淩落爾何求千里乘驢被黑裘空論作賦稱才子

未肯低眉事貴游，知君不得逢楊意。終媿明時老督郵。

譚舟石云：調亦

平平，氣却深穩。

觀伯虎寄贈子容洞庭山圖，因求作廬山障子。

丹巒氤氲拂空起，素練平鋪洞庭水。迴溪笑指毛公家，
忘却滄溟幾千里。我隔廬峰夢紫煙，嘗騎白鹿上青天。
煩君貌出仙人掌，西寄長安向日邊。

彭蠡

茫茫彭蠡口，隱隱鄱陽岑。地湧三辰動，江連九派深。揚

舫武昌客興發豫章吟不見垂綸叟煙波空我心

陸水脩云

襄陽遺韻

在武昌作

洞庭木葉下瀟湘秋思生高齋今夜雨獨卧武昌城重

以桑梓念淒其江漢情不知天外鴈何事樂南征

李舒章云

八句竟不可斷

登支硎山樓

谷寺憐幽密茲樓表麗觀煙雲連壑動竹樹入門寒獨

往迷前徑憑高遲所歡時聞有清磬遙出暮林端

送友人還吳

陽月隨陽鴈遙從塞上來北人江北望不見隴頭梅坐

下楊朱淚吟為莊舄哀聊傳數行札千里送君回

王于一云

不失唐人風格

嘉禾道中

檣李城何在蕭條草樹存未醒吳苑酒已動越鄉魂問

水來天目看桑過石門愁聞鶻鵲語寧聽楚山猿

俞石言云

道吾鄉風景者多矣方萬里出戶即乘
船徐昌穀看桑過石門語似淺而實深

月

故園今夜月迢遞向人明只自懸清漢那知隔鳳城氣

兼風露發光逼曙鳥驚何事江山外能催白髮生

朱子
蓉云

此詩却
學杜

秋日懷李郎中及邊熊二子

秋興因高賦雄才憶省郎山川思不極雲樹莽蒼蒼對
酒知時變看花感別長如何霜後鴈猶未達瀟湘

逢蠻使語

五嶺馳蠻使三秋達薊京北來江草盡南眺瘴雲平鄉
夢清猿隔邊心旅鴈驚辛勤萬里札懷笥未宜輕

送許補之還丹徒

憐君揮手去匹馬向南天旅病青山外鄉心落日懸燕

關變積雪淮柳動新煙驛路重雲裏相思易隔年

陳卧
子云

五六
新挺

送廬陵楊二尹

何卑執戟謝京華，却愛河陽縣裏花。
不為遠師招白社，擬從勾令覓丹砂。
青天挂席浮明月，螺水迴舟勝若邪。
莫學南昌隱君子，離羣獨拂五雲車。

贈別獻吉

爾放金雞別帝鄉，何如李白在潯陽。
日暮經過燕市客，解裘同醉酒壚傍。
徘徊桂樹涼飈發，仰視明河秋夜長。
此去梁園逢雨雪，知予遙度赤城梁。

王元美云：得崔沈
琢句法。陳卧子云：

果為神
到之作

送盛斯徵赴長沙

昔愁越雋千峰仄轉入巴渝萬里賒豈料聖恩憐賈誼
猶煩佐郡出長沙蠻中瘴遠三湘水江畔春逢十月花
遙聽岳陽樓上笛可能回首憶京華

寄杭東卿

西湖十月煙水平梅花參差千樹明越王城畔氣應早
林逋宅邊江更清驛使章臺空寄別霜天玉笛暗霑纓
故人若有揚州興為聽春鴻白雪聲

送耿晦之守湖州

遠下吳江向霅川，高秋風物倍澄鮮。
鵝鵲菰葉翠相亂，錦石游鱗清可憐。
郵渚撾頻津吏鼓，漁歌唱近使君船。
吳興峴山足勝事，漢水襄陽空昔賢。

鳳鳴亭

鳳鳥期不來，瑤華幾銷歇。
唯有山中人，吹簫弄明月。

香圃

露華散平林，月明在寥廓。
時有天風來，冷然桂花落。

古意

我有木蘭舟欲作三湘客
不愁湘水深但畏湘中石

內中偶述

朱宮殊方貢黃旗使者回
內園春未到青筍渡江來

答獻吉

花發平章宅鶯啼省樹春
殷勤花鳥意愁殺獨遊人

大道曲

長安樓閣互相望戶戶珠簾十二行
綠水過橋通酒市

春風繫馬有垂楊

羽林少年行

寶馬平馳過夕陰
飛丸遙墮掌中金
不知富貴緣何事
偏動青樓瞥見心

擬古宮詞

興慶池頭漏未闌
梨園弟子曲將殘
花前更進涼州伎
無那西宮月色寒

春思

渺渺春江空落暉行人相顧欲霑衣
楚王宮外千條柳不遣飛花送客歸

湘中曲

湘州草深鷓鴣鳴湘江水清多杜蘅
月明伊軋中流槳好似湘娥鼓瑟聲

送蕭少府

矯矯雙鳬塞隴分武夷殘雪半春雲
玉洞只愁仙隱去洛陽花下不逢君

送顧馬湖孔昭 二首

巴東明月巴西歌
兩岸梅花羌笛多
一曲停橈雙淚落
猿聲三峽若為過

錦水由來勝若邪
蘭橈三月泛桃花
巴兒見客能歌曲
蜀女明妝笑浣紗

安南歌送沈使君

烏蠻灘上煙水聲
伏波廟前秋月明
夜半津人挽舟上

夷歌偏動望鄉情

陳卧子
云渾成

送蕭若思

送君南下巴渝深予亦迢迢湘水陰前路不知何地別

千山萬壑暮猿吟

宗子相云直是供奉龍標風調

將發夏口

鸚鵡洲邊生暮煙旅人南望思依然盡道巴陵湖水闊

秋風莫渡漢陽川

望行人 二首

秋原迷望草芊芊幾樹荒鴉落照前驛使回時曾寄語

西風早晚渡秦川

綠蕪平野暮天低
遠色蒼蒼路不迷
昨日鄰家歸後信
行人只隔灞陵西

弔徐姬詩

并序

金陵有徐姬者善屬詩早死余嘗聞其句云楊
花厚處春陰薄清冷不勝單袂衣頗愛其有婉
思以詩弔之

繞廊吟罷楊花句
欲覓楊花樹已空
日暮街頭春雪散

杜鵑無力泣春風

楚中春思

遵義門前暮柳斜
武當城裏欲棲鴉
行人獨立宮牆外
又見空園落杏花

濟上作

兩年為客逢秋節
千里孤舟濟水傍
忽見黃花倍惆悵
故園明日又重陽

邊貢 二十六首

貢字廷實歷城人弘治丙辰進士授太常博士

擢戶科給事中遷太常寺丞出知衛輝府改荊

州陞湖廣

一云山西
一云河南

提學副使召拜南京太常

少卿遷太僕改太常卿提督四夷館進南京戶

部尚書有華泉集

朱中立云華泉之作雖不逮
李何然平淡和粹孝廟以前

海嶽之才無其倫比

袁永之云李何徐邊世

稱四傑李雄健何秀逸徐精融邊朴實故並有

盛名輝映當代四公殆藝苑之精英也邊稍不

逮祇堪鼓吹三家耳 湛元明云華泉嫻於才

書必如晉文必如韓詩必如杜以此收聲於時

何元明云世人推何李為當代第一予謂空

同關中人氣稍過勁未免失之怒張大復俊節
亮語出於天性亦自難到但工於句言而乏意
外之趣獨邊華泉興象飄逸而語亦清圓故當
共推此人王元美云邊廷實如洛陽名園處
處綺卉而不必稱姚魏又如五陵裘馬千金少
年項子長云弘治四傑其才各有所長李天
才雄健徐陶冶精融何藻思透逸邊朴實有餘
而華采不足胡元瑞云弘正並推邊徐何李
每怪邊品第懸遠胡得此稱及讀獻吉送昌穀
詩是時少年誰最文太常邊丞何舍人仲默贈
君采亦有十年流落失邊李之句則李何於邊
正自不淺予細閱當時諸家若仲鵬德涵敬夫
子衡詩皆非所長華玉升之繼之士選輩或調
正格卑或格高調僻獨邊視諸人差為諧合不
得不爾又云邊顧朱鄭之流派流甚正聲調未
舒歌行絕句時得佳篇古風近體殊少合作

鄭敬甫云邊司徒詩清婉流暢朗朗有致黃
清甫云邊詩詞旨淒婉調亦入雅歷下之產無
以過之越在太常蜚聲藝苑時獻吉主盟羣英
為輔君其一也俞汝成云華泉調逸情真氣
舒音亮不假深求自得風人遺韻陳卧子云
廷實粗率未除然時見精詣五言尤稱長城
宋轅文云尚書才情甚富故能於沈穩處見其
流麗陸水修云廷實篇法亦整但格律未道
當與華玉子衡伯仲譬諸才傑獻吉淮陰侯也
仲默鄼侯也昌國留侯也邊顧朱鄭樊鄴絳灌
之徒也世乃躋邊三家稱為四傑
生乃與噲等伍三君有遺憾矣

詩話華泉諸體不及三家獨五言絕句擅場昔
宋吳江令張達明與客論詩其言曰詩莫難於
絕句尤莫難於五言欲其章短而意長辭約而
理盡華泉庶足當之大復贈詩云陽春誠獨步

清廟徒三歎以絕句論
邊亦無愧於三家也

贈友

春陽初獻歲芳樹日以青送遠及近郊何由申我情我
情方鬱紆君駕不可停瞻彼飛鴻翼聯翩共遐征奕奕
雲中河爛爛川上星中原渺難遂佇立以屏營

分韻再送文熙

夜久河漢橫春堂別燈黯風淒鳥初動露重花猶斂明
發不在茲重闕為誰掩

答石峰見懷之作

斗柄當西南河漢東北傾
零零露華白皛皛天宇晴微
風度廣陰熠燿時復明
卉木日已黃秋氣日已清
念子理素瑟苦調多離聲
嗷嗷失侶鴈泛泛隨波萍
會合固有期此日難為情

次韻贈李子行之如陳

迢迢阻歡宴戚戚傷離居
離居結中懷鬱鬱慘不舒
若人美無度貞抱沖以虛
朝為同朝客夕暮隔林墟
林墟

積秋霖流潦不可除四野晦蒼蒼行行安所如驅馬臨
大道瞻顧空踟躕

運夫謠送方文玉督運

運船戶來何暮江上旱風多春濤不可渡裏河有閘外
有灘斷篙折纜腰環環夜妨鼠日妨漏糧冊分明算升
斗官家但恨倉廩貧不知淮南人食人官家但知征戍
苦力盡誰憐運船戶運船戶爾勿哀司農使者天邊來
送馬敬湖赴湖南提學

征馬帶落日出門君已遙層城不隔夢夜夜盧溝橋盧
溝橋邊車簇簇故人却在城南宿誰令相見轉多情翻
恨遲行不如速江漢風煙遲早春關山雨雪暗邊塵臨
岐莫動殊方感余亦東西南北人

題豐內翰愛鳧樓

春鳧呼其侶拍拍戲芳渚一鳧忽驚人羣鳧共高舉回
翔集城下點點散如雨愛鳧主人今幾秋夕陽空上望
高樓憑闌獨送千里目平沙莽莽寒煙綠

張夏道中遇雨短歌示同行希尹諸子

南山北山雨如注寒風颭颭吹山樹中河水發行子愁
褰裳欲渡且復休黑霧蒼雲蔽村舍咫尺誰能辨牛馬
嗟哉出門百里行路難我今胡為在中野

出郭將訪希準郡伯懼暮而返却寄

駕言江口出却至水西還遠道空回首重門欲上闕斷
雲低白鴈斜日近青山欲採瑤華贈仙舟不可攀

和答胡可泉郡伯

籍籍胡安慶新聲滿舊都詎知金馬客翻領玉麟符退
食還經史登樓即畫圖昔賢憂樂地元只在江湖

送都玄敬

驅馬別君處秋陰當暮生林柯無靜葉江鴈有歸聲綠
水閭門道青山建業城未能同理櫂延佇獨含情

次獻吉留別韻

初春郊甸積雪滿客子出門歧路長征車杳杳去不息
關柳青青殊未央却望秦山懷故道即歸梁苑亦他鄉

十年京洛交游地日夕風煙思渺茫

留別貞菴

陰陰汀樹起秋煙冉冉溪花接暮天
歸鳥獨衝淮甸雨離人新上汶陽船
病餘藥物求芝朮老去心情託簡編
他日會傳招隱賦緘封應寫渡江年

送劉約中之金陵

君到石城邊應看石城樹樹杪百尺臺是儂行樂處

蔣仲

舒云詞直截
而意婉曲

贈別甯子

白日就長道清秋凌大河非關燕趙別相送一悲歌

西園二首

朝看長白山暮看長白山山色有朝暮吾心常自閒

庭際何所有有萱復有芋自聞秋雨聲不種芭蕉樹

元王

美云芭蕉豈可言樹芋豈庭中佳物且獨無雨聲乎俱屬未妥若作自憐秋雨滴不復種芭蕉或作自聞秋雨聲不愛芭蕉色

覺意尤深婉

詩話杜牧之詩一夜不眠孤客耳主人窗外有芭蕉呂居仁詩如何今夜雨只是滴芭蕉張安

國詞點點不離楊柳外聲聲只在芭蕉裏無名
子詞窗外芭蕉窗裏人分明葉上心頭滴古之
愁夜雨者多以蕉葉為辭高荷大芋非所憎也
元美謂廷實芭蕉不可言樹然維摩詰經云是
身如芭蕉樹而不堅固是芭蕉
未始不可名樹元美之言過矣

雜詩

月色沙上澹山雲天際浮春江萬里闊獨見一漁舟

題畫 二首

鳥啼青石岡日照紅泥坂杳杳雲外鐘山僧獨歸晚
近浦寒潮落平沙返照紅不嫌歸路晚家在板橋東

迎鑾曲 四首

金陵自古帝王都
碧石清江一畫圖
列聖百年虛想像
鑾輿曾到此間無

自采民風問老農
微行不遣近官從
那知天子闕天象
到處雲成五色龍

弓如滿月向江開
箭插寒潮卷浪迴
水上鼉鼉莫深避
我皇元為射蛟來

潮落江門煙水秋
雲帆月下過揚州
兩京馳道三千里

夾岸垂楊接御溝

柳塘雜興

御溝東畔柳成林
一水盈盈十里陰
白馬青衫橋上客
春來多少故園心

山行即事

陵署青青生午煙
山渠泐泐響春泉
白頭宮監松陵下
閒說英皇北狩年

康海

五首

海宇德涵武功人弘治壬戌賜進士第一授翰林修撰尋以救李夢陽坐逆瑾黨落職為民有

對山集

張孟獨云對山詩以興致為先格高詞俊足以凌駕古人羽翼騷雅張文邦

云對山既弘詩規又開文運時仲默獻吉敬夫號海內三才而公尤獨步王元美云康德涵如靖康中宰相非不處貴恒擾粗率無大處分王敬美云對山五七言詩間多率意之作直據胸臆或韻至便押不必盡麗典則穆敬甫云德涵詩有極佳者乃為友人置而不錄遂有長吉之恨俞汝成云對山文勝於詩陳卧子云對山粗率殊無足觀詩話德涵坐援獻吉遂挂清議歸田之後耽心詞曲其小令云真箇是不精不細醜行藏怪不

得沒頭沒腦受災殃從今後花底朝朝醉人間
事事忘剛方溪落了膺和淘荒唐周旋了藉與
康論者原其心而悲之沒時家無長物腰鼓多
至三百副畱心風雅之日少宜其所就止此爾

游西別業同承裕升之作

還耕愜初願揖世返空林雖非志士理已獲靜者心嘉
賓青雲客枉駕忽相臨攜酒共斟酌張絃揚妙音義厚
情自叶道合契滋深漪漪漳川水幽幽南山岑相值不
相樂奈此逝者侵

觀木

我來彭麓下坐愛青山色雨過忽新涼蒼煙望無極秋
禾行欲成豈畏驕陽逼攏畝綠如屯原隰少螟螣同欣
有年樂詎知天子力

對客

絲竹憐吾嬾尊壘待汝來片雲霄漢沒叢菊小籬開積
雨難相過當歌莫謾迴請看秋草色黃滿建章臺

鹿苑懷太微

鹿苑何王殿明時尚賜秦芳林春礙日幽草晝眠麋畎

畝餘生計乾坤信此身西京誰欲賦韋曲有詞人

四月十九日宴東侍御園亭醉中走筆

燕家小妓石榴裙笑酌醪酥把似君玉面未能花底出
瑤箏先向月中聞

王九思 五首

九思字敬夫鄆縣人弘治丙辰進士選庶吉士

授檢討調吏部主事陞郎中坐劉瑾黨降壽州

同知尋勒致仕有漢陂集續集

李伯華云漢陂
因懷陳致寄景

道情出入風雅騷選之間振迅開元天寶之上
王元美云敬夫如漢武求仙欲根正染時復
遇之終非實境 俞汝成云漢陂礪硯廓落有
太樸不雕之風 穆敬夫云敬夫工於小詞而
詩亦不落元宋體頗謂兼才惜乎遊春一記自
遠風雅也 顧玄言云敬夫才雋思逸銳於綺
麗譬之湖外碧草海
東紅雲流彩奪目

詩話康王並以樂府擅長而詩
鮮合作王差勝康樂府亦爾

對酒憶康五

林棲鮮儔侶芳醕聊獨親繁香媚晴

一作旭

景嘉賓及茲

辰習習谷風發萋萋卉木春黃鳥鳴枝間翩翩求其羣

對此豈不樂念彼同心人室遠心徒勞
追趨靡所因安得驂雲霓頃刻馳見君

聞盜賊且至登壽州南城樓野望兼示避盜諸君

子

極目川原外無言自愴神雲山晴見楚煙樹遠浮秦平
地干戈滿臨風羽檄頻西飛羨歸鳥隨意過城闌

游西莊春日行樂詞

金馬當朝彥銀魚隔歲焚高棲丹鳳麓閒卧碧山雲湘

瑟春風度秦箏月夜聞太平無一事只合醉朝醺

亳州

出門二月已三月騎馬陳州來亳州暮雨桃花此客館
春風燕子誰家樓簿書堆案不相放太守下堂仍苦留

浮名羈絆有如此媿爾沙邊雙白鷗

周青士云
類唐有致

十四夜月與李二獻吉飲

萬戶秋風碓杵哀殊鄉今夕故人來竹間涼露蕭蕭下
樓上浮煙細細迴地僻柴門無過客家貧樽酒有餘醅

疎簾碧簟須同醉明月青天為爾開

王廷相

十九首

廷相字子衡儀封人弘治壬戌進士選庶吉士
改兵科給事中以言事謫判亳州拜監察御史
巡按陝西為鎮守廖鑒誣奏下獄再謫贛榆縣
丞稍遷寧國同知歷四川按察使拜副都御史
巡撫四川入為兵部侍郎都察院右都御史進
兵部尚書提督團營仍掌院事加太子太保卒

謚肅敏有家藏內臺二集

薛君采云先生詩豪氣太露其工者較之

古人不啻過之

王元美云王子衡如外國人

投唐武將坐禪威儀解悟中不免露抗浪本色

穆敬甫云王詩如飛廉煽吹白羽失涼顧

玄言云司馬學古才辨特闢古體如闕里孔檣

秦嶽秦松蒼秀挺鬱黃清甫云浚川詩貴達

意不避險直多擬古樂府欲返真樸未見其上

君采出其門下所謂青出於藍也陳卧子云

子衡詩有沈鬱之思壯麗之色宋轅文云子

衡莊雅有法長於五言若近體

則元美所云武人坐禪者是也

詩話浚川數歷之暇銳意詩文非徒扶大雅之

輪抑且挾羣經之奧而又見善如不及其序空

同子詩稱其掩蔽前賢命今當世秦漢以來寡

見其儔然空同名成之後目空四海觀送昌穀

之湖湘詩述一代人文之盛有云是時少年誰
最文太常邊丞何舍人三子而外並不及浚川
隻字也鄭繼之未嘗謀面乃有句云海內談詩
王子衡春風坐遍魯諸生宜浚川見之有知己
之感於繼之身後賦少谷子歌焚其橐於燕望
閨再拜歌云彼時才傑游帝傍信陽之何棠陵
方大梁翩翩李川甫吏部薛生尤擅長於空同
亦未齒及不無憾焉矣他日作遣興十首其一
云昔吟吳下徐昌穀幻出斯文百代先其二云
逸氣誰當鄭善夫其三云康子文章迴絕塵其
五云大復天才冠兩都其六云後來誰擅六朝
奇君采分明別綴詞其七云散逸長年何粹夫
獨於空同則云疏越朱絃大雅沈始知清廟有
遺音峽江迫阨湍瀾出可是空同太劇心殆有
微辭焉信乎恩怨之難忘也浚川詩格諸體稍
猶惟五言絕句頗有摩詰風致下亦不失為裴

十秀才崔

五員外

靳民謠
四首

有芄者父生我土七年之病得者愈五内失調邪作主
當貴耽慾乃自取艾縱有靈將奚補我欲言之上官怒
龜羣生毛綠的的大如錢貴如壁養來盆中水凝碧細
人之玩有何益

白花蛇誰教爾能辟風邪上司索爾急於火州中大夫
却逼我殺爾種類絕白花不生禍胎滅

龍鬚作席光電電暑眠不及斬陽簟涼如水滑如藤一
簟幾工能織成官府取之只一聲有價無價誰敢爭

赭袍將軍歌

萬壽山前擂大鼓赭袍將軍號威武三邊健兒猛如虎
左提戈右跨弩外庭言之赭袍怒牙旗閃閃軍門開紫
茸罩甲如雲排大同來宣府來

九日安陵同蔡成之發舟

亢帆安陵浦泛舸清川潄渚枉倦迴沿厓傾詫崎嶽寒

原變淒候浮靄散層陰落日隱叢薄孤霞冒平林雖同
佳人娛屢興游子吟曠達獲自古維繫慚在今緬懷籬
下菊結念丘中琴川塗渺無緒風波浩難任

秋日巴中旅行

巴東秋氣早行客已悽悽江險深三峽雲寒暗五溪中
原無鴈至異國足猿啼況近烏蠻塞連年尚鼓鼙

旅思

野雲蕭蕭逐我迴西從閬苑東蓬萊偶傳靈藥足自寶

持示世人番見猜不知黃鵠幾時到縱有素書誰與開
旅食淹留斷消息故園風雨空池臺

春草謠

塘上艸離離照妾春羅衣待君君不來滿庭螢火飛

秦川雜興

古陵在蒿下啼鳥在蒿上陵中人不聞行客自惆悵

初見白髮

日日風塵色勞勞簿領身不知清鏡裏已作二毛人

蔣仲

舒云懶
數愁絕

漢上歌

宜城出美醞載入習家池山公去已久醉殺襄陽兒

宮怨

夜輦昭陽月春筵上苑花不成供奉日枉自學琵琶

宗子

相云如
泣如訴

閨中歌

天闊浮煙迴沙平落照低春江同在眼只覺異巴西

漫興

一琴几上閒數竹窗外碧簾戶闌無人春風自吹入

巴人竹枝

楊花作雪草連天郎下荆吳又一年江上浣紗郎不見
問郎錯問下江船

泊嘉善縣

千峰萬峰廣德路晝行夜行湖州艘七十五橋今過盡
畫船明日入松江

宣州歌

河瀝溪頭伐鼓行五湖渡口櫂歌聲怪來畫舸如飛去
一百八灘春水生

金陵歌

山到金陵龍虎分大江環抱日生雲千年宮闕存遺事
猶有都人說建文

明詩綜卷三十六

欽定四庫全書

明詩綜卷三十七

翰林院檢討朱彝尊編

朱應登

三十三首

應登字升之寶應人弘治己未進士除南京戶

部主事遷知延平府以副使提學陝西調雲南

尋陞布政司右叅政有凌谿集

李獻吉云凌谿
飲醇探臍噴英

摘華樹聲菰林時華玉元瑞昌國號江東三才
凌谿乃與竝奮競聘吳楚之間顧華玉云升

之才華彪發泉涌每當人落筆一掃千言荀觀者往往奪氣其詩上準風雅下采沈宋磅礴蘊藉鬱興一代之體康德涵云凌谿清新俊逸有國風之材許伯誠云先生訓諸生云文者言之精也詩者言之華也精則寓文於質故先體格而後組飾華則緣情製詞故首興致而尚婉約漢魏詩雅而遠六朝詩豔而縛辭隨世異情由衷發吾於唐取其溫厚焉乃知見定於中言發諸外篇有所本辭有所裨信乎必傳也已王元美云朱升之如桓宣武似劉司空無所不恨顧玄言云大叅情過其才亦時出新語陳卧子云升之有詩名而合作殊少靜志居詩話李何竝興李目空諸子自三秦而外得其門者蓋寡心慕手追凌谿一人而已其口占絕句云文章康李傳新體驅逐唐儒駕馬遷蓋其文亦宗北地者祝希哲贈詩云大韶張

宮懸九變盡美善陳魯南詩云摘毫揚美詞肆
意逐高雲李獻吉詩云疏越發潛響爛若端錦
舒徐昌穀詩云神飈清管發逸興白雲俱其為名流所賞如此

雨雪曲

行道廣且深霏雪何飄颻晨風無終極烈烈吹我裳長
冰斷四澤灝景瀾八荒遙矐達周原廓哉無何鄉迫觀
古巖側磧路如羊腸獵人攜犬至窮獸走彷徨僕饑委
道阪馬疲不能行戍旗動高隧云是甸子岡超驤媿局
步躑躅徒自傷

擬陸機招隱

脩塗苦躑躅曲澗聊盤桓
盤桓將安之所樂在淵泉清
冷足朝盥幽眇窮夕觀
雲構蔽層木翠幄引芳蘭
玉鯉胃輕罍銀縷落素盤
忽枉良朋儔誠款慰夙歡
富貴豈不欲時命非可干
稅駕從所適茲焉以永歎

野中作

細細朝雨零纖纖麥苗長
丁夫荷鋤出所至成偃仰
林喧羣意動山空百泉響
佳境偶獨逢無人共幽賞

贈別黃子和

舉世昧所欽見客隨諧嬉良朋久寂寥十載惟君知把
袂執素手懽悰不自持人事忽生變與君長別離膏車
岐路側欲發更遲疑虛名夏厨蠅短景朝華枝兩心各
相許脈脈無一詞濁泥媿清塵何以備驅馳盟言願有
終白首以為期

贈劉元瑞守紹興

朝出承明廬駕言還故鄉當門結旌旆觀者倍生光故

人欣再見眷眷意難忘舉觴承湛露頌德詠羔羊周官
十二牧職貢各殊疆持子夙夜心坐致黎庶康深衷豈
念此但感別日長相彼水中鳬羽翼同翱翔風波一失
所望望徒心傷

夢大復何子

京華一云別瞥若紛飛翼遥遥南中道念子無消息歲
徂寒暑變日落風雨黑詎知萬里魂能達君子側篇章
煩見示觸目見古色瀏瀏清瀨鳴擢擢朱絃直指摘發

雋語要我以終極大質多渾成至寶去雕飾晤語忽復
竟驚起謝良德音徹猶若聞轉盼已難即悵悵牽垂帷
仰睇梁月色何由託歸鴻附此長相憶

酬方思道以詩帙見寄

方子還山中兩度寄詩帙憐予方在疚報答百不一故
人枉相存所恨越阡術江南十月交山中稼應畢天寒
脆榆柳霜重熟棗栗理甕得舊醅攀厓割新蜜既可歡
親顏亦堪悅家室吾翁嗟已晚念此重有失尚幸老母

康麤以慰蓬華人生歸有道貧賤匪所恤作詩謝同懷
商風振瑤瑟

函谷關歌

朝出洛陽城暮投函關道函關日落行人稀滿目黃雲
暗秋草此地古來西屬秦崩城敗壁猶嶙峋牛車冉冉
行不盡更愁怪石摧車輪關門老子去已遠吾生學道
嗟何晚紫氣猶經舊路迷青牛不見當時返只今豺虎
正縱橫羽檄星馳大點兵徼巡司隸督責苦關下居民

旦夕驚疎林漸指新安麓夜火人歸茅店宿雞鳴客起
四散分令人忽憶孟嘗君

過分水嶺有懷同志

前歲南過分水關十月天晴花滿山今年西度分水嶺
九秋積雪浮寒影天時南北有常運人事蹉跎發深省
中原日夕狼虎多遊子出門行荷戈魯儒捫衣蹈白刃
汴京灑血腥黃河東橋作郡夷門裏南原卧家猶未起
石亭抱璞隱城市鳬塘買田歸雲水有懷幽吐真自知

海內論心竟誰是春日淮南黃栗留丁丁伐木聲相求
此時誰遣不歸去梁令還家尚黑頭

北風行

昨日南風揚今朝北風急南風吹山山不移北風吹海
海欲立軒轅臺前燭龍晦紇干山頭凍雀泣行人戢足
不敢行我獨何為向原隰田父停歌向我笑笑我投簪
滯鄉邑然桂作薪炊玉粒空囊無錢太羞澀我云蓼蟲
之性甘習苦亦聞龍蛇歲晚當深蟄行藏得失本天道

古來賢哲何嗟及君不見北風雨雪洛陽城袁安卧內
無人入

對雪

對雪饒幽思清吟酒半醺撲簾寒未起灑葉細先聞風
急仍含雨天低欲墮雲晚看庭篠色漸喜白紛紛

孝宗皇帝挽辭

經杖生新感朝儀改舊觀喪經仍漢制顧命續周官萬
國函香拜諸王畫像看蒼天高不極贊德自知難

哀谷亭 二首

聞道團營將前茅未進師居民坐塗炭揮淚望旌旗柳
色烽煙外鳩聲穀雨時移家若飄梗誰暇問東菑
齊魯何多盜冬春未解圍元戎休按轡黎庶待宣威戍
久軍芻竭城寒士氣微猶聞安撫使先已獻俘歸

觀楚人插秧

插禾憐楚俗田畛綠層層共道臨芒種那能避鬱蒸歌
詞人互答音節鼓相應但使民多粒寧憂穀價騰

渡淮 二首

楚岸崩沙仄淮流積潦深沙明疑雪霽潦迴似秋陰舟
楫煩相待炎蒸喜不侵重憐行宦地獨感濟時心

水外長天盡煙中遠嶼銜即看乘決滌已若釋憂讒波
撼青楓樹涼輕白紵衫舟人不愁思滿引夕陽帆

贈蔣子雲

別懷無近遠送子即淒然文采東都守明時萬里遷江
舟迴夕浪汀草暗春煙却望來時路長安在日邊

園居即事

首夏衡門裏清波四望通
古槐垂密蔭細草結幽叢
庭灑黃梅雨簾鉤紫燕風
林堂多發興興至復誰同

雨後晚眺

小雨經檐盡殘陽隱樹低
迎曛花氣合向夕野容迷
寶刹流雲外金塘去鳥西
吾生江海意隨分此卑棲

癸未書警

物態傷吾意流離滿道傍
雨鳩頻逐婦風鴈忽分行
自

分惟溝壑何人且廟廊舊時阡陌在虛望返耕桑

檐雨

中歲仕三已晚耕天一涯僻居寡儔侶開戶對桑麻檐
雨隨風亂溪流逐岸斜時時值野叟爭度坐鷗沙

舟至臨清大風晦冥聞過客言谷亭盜賊之勢甚
劇感而賦此

聞說王師北出燕山東羣盜故依然沙城風起塵如霧
澤國春陰水作煙過客盡傳烽火警行人愁度谷亭船

平原太守今誰是慷慨多慙石二千

登王孫亭望華嶽

華嶽遙瞻勢已雄河流入望更無窮羣山總出三峰下
衆水同歸九曲中絕塞衣冠通上國行人車馬入新豐
漢家陵邑依然在擬賦西都恐未工

秋興

曠騎憑陵八月風羽書朝暮九華宮金吾宿衛臨關外
宣府遊兵集禁中燕塞河山天下險秦陵恩德衆心同

誰能補衮供臣職莫遣宵衣損聖躬

滄浪江

千尋鐵鎖貫長橋積翠浮天萬壑遙人向中流看砥柱
路從平地入峒嶮未論文教開荒服已見蕃王款聖朝
鳥語花明迎使節滄浪江上瘴全消

滕王閣和韻

樓為名高轉被憎詩人翻怯後來登嘉賓勝日難兼得
廢址遺文託再興慷慨尚懷投筆吏寂寥私念校書丞

留題擬附三王後魏乏袁州刺史能

騰陽元夕

殊方節序漫相親又見春燈照眼新
秦苑煙花三輔夢梁州風俗隔年身
千門宛轉迎華月九陌逶迤起暗塵
淮海路迷何處所孤城深鎖獨愁人

登岳陽樓

岳陽樓前看洞庭三江水多愁杳冥
殘陽欲盡孤鳥沒君山之樹何青青
題詩直防鬼神泣吹笛恐有蛟龍聽

先采香蘭招屈子徐歌瑤瑟報湘靈

田中雜吟

高田低田湖水浮南垞北垞梁稻秋明沙日入有棲鴈
獨樹風寒無繫舟白草直隨平野盡滄波真帶暝煙流
時艱漸老雙蓬鬢歲杪空餘一敝裘

大駕東巡野語

聞說天王西狩頻翠華今日又東巡泰山重被登封頌
梁父親承羽獵塵曉日霏煙開帳殿朔風寒雨暗楓宸

江都十月花零落莫遣龍舟望幸新

湘中雜興 二首

湘渚草深鵲鵲鳴湘江水清多芷蘅月明伊軋中流槳
疑是湘娥鼓瑟聲

春草千里碧沈沈蒼梧雲昏湘水深此中自古行人怨
鷓鴣雙啼斑竹林

顧璘 二十首

璘字華玉先世吳縣人徙南京弘治丙辰進士

知廣平縣徵入為南京吏部主事遷知開封府
降知全州起知台州府累遷至浙江左布政使
擢右副都御史巡撫江西乞終養忤旨勒致仕
再起巡撫湖廣顯陵工竣加工部尚書還朝改
南京刑部尚書有息園浮湘憑几山中歸田諸

集

表永之云弘治間獻吉昌穀仲默相與表裏
以鳴國家之盛華玉頡頏其間損吹篴應莫

敢軒輊他如希哲之宏博伯虎之奇俊繼之
古淡升之之精工太初之清曠履吉之麗逸玄
敬之冲泊伯時之醇菴欽佩之雋質叔鳴之新
警咸號名家竝稱國手 陳羽伯云華玉抽毫

數藻前無古人 文徵仲云華玉文不事險刻而鑄辭發藻必古人是師詩尤雋永雖矩矱唐人而劉除陳爛時出奇峭樂府歌詞亦不失漢魏風格頡頏獻吉仲默升之昌穀間不知孰為高孰為下也 王元美云顧華玉如春原盡花芭蘼不少又云華玉才華在朱鄭之上特以其調少下耳 穆敬甫云顧公吳中才子有知人鑒為當時風雅主盟詩亦奇古不俗 顧玄言云司寇體裁變創工於發端斐然盛明之羽翼也 黃德甫云顧詩發源清淺沿流徘徊忽有所觸一振其響清映林樾頓洗俗聽如高林忽在下衣襟有雲霧倒景猶照人平地黯將暮可謂春容雅韻又江橫羣水合野闊萬峰開描寫江山超於凡想 陳卧子云華玉才情警麗但風格未高 俞右吉云華玉詩如金塘緬演積芳選木春華有餘所乏秋氣

詩話華玉與劉元瑞徐昌穀號江東三才又與陳魯南王欽佩稱金陵三俊當李獻吉何仲默詩名未盛時藉其弘獎而王穉欽顏惟喬輩皆其所賞識闢息園於居室之後鑿池壘石築載酒亭於西隅延接名士討論詩古文辭張讌輒以箏瑟佐觴有小樂工楊彬善曲每詭於客曰此蔣南泠詩所云消得楊郎一曲歌者是也既負海內重望過時貴人或傲然不為意而山林寂寞之士虛已下之祝希哲著觀雲賦唐子畏著廣志賦華玉恒對客誦之及嚴惟中招飲既坐嫌其酒冷惟中令易熱酒華玉又嫌太熱指顧揮霍目無主人嘗至浙訪孫太初幅巾道衣放舟西湖上一夕見有舟泊斷橋下一僧一鶴一童子煮茶華玉笑曰此必太初也移舟就之遂定交焉入楚試童子得江陵張叔大奇之入謁脫所束屨帶與之曰子他年所綰不止是留

此見老夫非虛譽爾穉欽既失志日與狎客鬪
雞走狗華玉欲見之穉欽不肯往乃以計恐狎
客乘其出游疾趨而前穉欽亟走匿為狎客夾
持之強留之具賓主禮蓋其求友之勤如是所
撰國寶新編錄獻吉以下一十五人
各系以贊其交也廣而擇之也峻矣

題龍巖額有賦

蒼厓積鐵古中空若天開不知寒泉水潺湲自何來石
田莽重疊上有仙人臺淋漓濕元氣玉黍長蓓蕾青春
始來游桃花映樽壘主人邀痛飲酣歌日西頽獨揮菁
茅帚書破巖上苔巨靈拍掌笑大劫俱揚灰吾意在山

水短長安計哉

南巖雷神祠

雷神棲何所巖洞深杳冥幽林蔽日影寒澗餘龍腥經
年尚留雪當午仍見星石竒出變相境勝通神靈譎怪
山海事流傳信前經

度楓木嶺

初謂山拂天飛鳥不可度逡巡躡危磴乃即我行路百
折頻攀援十步九回顧高林忽在下衣襟有雲霧倒景

猶照人平地黯將暮東北望故鄉江流莽傾注長風動
萬里獨立難久竚

東郊田園

二首

陶公歸桑里謝客營石門於世既無競努力事田園春
還理荒穢良苗應時繁豈不念歲豐天道難預論列槿
藩草屋藝蔬備晨飧郊居漸成趣益厭城市喧菽水苟
無闕萬事奚足言

刈麥思時暘分苗望時雨彼蒼於農人遷就亦良苦好

雨從東來原田白
撫撫老穉荷蓑出
綠縵紛可覩連歲
荒負租頗遭官長
怒今幸占有年且
願給公賦絮酒兼
炙雞殷勤祝貓虎

碧溪

落落高梧陰俯瞰
寒流碧微雲過疎
雨秋容澹無迹魚
遊綠藻晴鳥下青
蕪夕興至每垂綸
歌罷還岸幘漁父
兩三人時來共爭
席

辨蛤和涇川公

漁海窮滴沱獵山歷崙岬生人胡多勞養此六六牙聖
哲著禮經細不遺螳蛙食黿一染指因以傾厥家末俗
貴珍異載籍紛喧譁美哉爾石蛤奚免網與又修脰雪
長苻腴中剖團瓜烹以實下豆亦慰賓筵嘉南荒盛蟲
族大者蛇與蟁瑣細及百種射影兼含沙食者苦漚泄
傷者困瘡痍例舉混美惡頗笑昌黎差幸蒙七箸賞重
以褒辭加河豚自此賤況復論魚鰕

送陳魯南上陵

松柏西陵路詞臣仗節來衣冠瞻漢寢弓劒拜軒臺細
雨春山濕明星今殿開年年揮淚地不見長蒼苔

簡陳宋卿

頗怪陳無已尋詩日閉門空庭疎繫馬細雨負清尊節
序過梅萼春陰積蘚痕不嫌官舍冷燒燭對黃昏

丙子元日於郡齋作四十韻

南紀江潭遠東風節序移流年傷久客多病負明時稼
穡功何補鶯花興匪宜嶺梅虛照眼江柳莫搖絲憶昔

為郎日承親樂在茲都城依斗極畫省綴雲司祿米供
調膳家園奉杖藜閒情潘岳賦燕喜魯人詩棣萼連庭
發槐陰拂地垂書編長枕籍酒竿亦淋漓契合多良友
招邀慰所思聲華傾座重精白寸心知松檜寒逾勁驂
騶老不羈已堪徵道義況更得師資西漢才方盛東周
夢豈衰立談期化理傾倒絕猜疑中路罹多難專城試
一麾梁陳高賊壘河朔走征旗苦乏勤王略空懷報國
私援枹臨矢石飲血撫鰥嫠僅免投豺虎方思伴鹿麋

愚蒙仍觸法覆載本含慈斧鑕逃輕典丹青發朽姿恩
波猶五馬竄地異三危水鏡開城觀星躔壓地支國風
饒比興民俗重耕犁桃水居人樂華胥帝載熙頤容山
簡醉未釋賈生悲信美非吾土浮名已後期形容麟閣
遠羽翼鸚圖卑即事驚華髮無階叩赤墀大懼惟菽水
野性一茅茨納履思投足談經得解頤文章闕不朽氣
格許誰追能事輸前列洪鈞貴自持陶鎔兼物類渾樸
斷人為郁郁希游夏勞勞去管伊行藏俱自得筋力豈

空疲細雨衣襟淨深山卧起遲時尋老漁父同釣楚江
湄

庚辰元日

諸侯玉帛會長安天子旌旗下楚關共想元正趨紫殿
翻勞邊將從金鞍滄江飲馬波先靜黃竹回鑒雪未乾
北極巍巍天咫尺五雲長護鳳樓寒

和英玉聞秋佳亭新移悵然作兼簡王禮部欽佩
秋佳亭子臨秋水伐木新移向近陂小徑有時迷客入

長楊無數遶檐垂
即看野鵲春來喜
莫怪羣鷗晚下疑
寄語東鄰王禮部
好攜樽酒數追隨

寄張司馬九月六日憶湘山寺舊遊

遙憶東山張太傅
去年今日共離觴
清江畫舫愁中別
落月楓林夢裏長
黃菊再逢非舊日
白頭相見定何鄉
題詩欲寄衡陽去
目斷西風旅鴈行

懊惱曲效齊梁體

小時聞長沙說在天盡處
人言見郎船已過長沙去

歸自灌園陽望湘山口占

十日別湘山見如故人面何況石頭城是儂舊鄉縣

雨中溪行雜詩

二首

十日溪中舟格格響溪石孤蓬過鳴雨忽失沙上脊

日暮爭渡喧天陰野風急孤客來何遲蕭蕭荷鉏立

移疾

二首

山頭雨晴泉入池黑牽牛花開滿籬閉門三日簿書歇

恰直遠人來賦詩

秋至一月暑仍酷西風忽振庭梧飛白雨連山雲匝地
滿城兒女覓秋衣

埽階竹

高巖短竹餘一尺纖葉裊裊青鸞毛空山無人月華冷
西風滿地秋蕭騷

陳沂四首

沂字魯南其先鄆縣人徙家南京正德丁丑進
士改庶吉士授編修進侍講出為江西叅議歷

山東叅政轉行太僕寺卿有遂初齋拘虛館二

集

顧華玉云石亭詩人謂其類東坡亦自號曰小坡中歲乃宗盛唐

陳羽伯云魯南藻性

天成尤多賦詠文采照映一時

穆敬甫云太

僕詩宏博精深當屬大家

顧玄言云石亭與

華玉欽佩竝稱讀其詩恍乎臨蓬山而俯瞰閭

苑深遠鬱然

李時遠云魯南古體埒漢魏長

篇似太白近體

在開元之間

詩話魯南詩亦勻整第乏警策蓋

心懲北地勦襲之非而限於力也

山寺

出郭少人事更居林壑間僕因隨主嬾僧反愛吾閒碧

草生滿地白雲常在山城中會相問未卜幾時還

夏日雜興

野寺清涼舊有名空廊還傍石頭城侵階竹蔭差差轉
入座荷香細細生西府山前車輦路南唐宮裏輓轡聲
冰漿玉盃傳瓜處想像君臣萬古情

送石太宰代祀泰山闕里

上卿膺顯命元祀向東方喬嶽瞻青岱生民有素王邁

邦齊

一作周

望秩過魯式

一作漢

趨蹌埽地如躬陟撫衣儼

帝將諸峰求禪土數仞入宮牆仰止巖巖外周旋翼翼
苟俯窺宜小壤密造豈升堂峻極神應降惟馨道益光
往哉公不忝簡在事非常媿乏崧高詠風雩代詠章

寄顧全州

曲渚

一作浦

湘雲暮叢

一作幽

篁楚雨秋愁心寄鴻鴈煩爾

過衡州

王韋

三首

韋字欽佩上元人弘治乙丑進士選庶吉士授

南吏部主事改兵部遷禮部郎中陞河南提學

副使終南太僕少卿有南原集

顧華玉云少卿論詩專尚才情

其言曰唐風既成詩自為格不與雅頌同趨漢魏變於雅頌唐體沿於國風今以雅文為近詩未嘗不流於宋也故其詩婉麗多致雋味難窮或者謂為纖弱豈知所操之殊向哉陳羽伯云欽佩詩有晚唐溫李之風王元美云王欽佩如小兒女簪花學作軟麗李時遠云太僕詩婉曲濃鮮

頗類溫李

詩話欽佩詩其源出於溫八又比之義山不合也其最著者閣試春陰之作篇中起來小步傍闌階花霧襲衣寒氣重李賓之批其卷云二語如有神助遂登上選相傳欽佩為秀才時夢中

曾聞人誦之此與錢仲文湘靈鼓瑟事相類儲
靜夫又賞其朱樓十二畫沈沈畫棟泥融燕初
乳之句亡友王介人則謂苔花蒼潤上簾櫳濛
濛經雨還未雨二語尤貼切予意要不若空庭
簾卷畫亦暝隔牆惟見桃花明狀春陰更工也
欽佩以疫終見顧東橋集列朝詩稱其以母喪
毀瘠卒益攷
之未詳云

懷師友

幽薊多北風塵埃旦暮起嚴冬十二月積雪更千里落
落高樹擁靡靡勁草死中庭獨彷徨念我同懷子遙遙
涉玄冰單車渡易水歲暮人閑闕何為遠遊此

春草

帶雨和煙未可名
春風處處不勝情
於今南浦知多少
都向王孫去後生

柳枝詞

渭水西來萬里遙
行人歸去水迢迢
垂楊不繫離情住
只送飛花過渭橋

田汝棣 二首

汝棣字深甫
祥符人
弘治中舉人
官兵部司務

有莘野集

俞汝成云莘野專尚
氣骨不作卑弱語

席上贈推官還太平

萬國朝天罷孤城返旆行
清秋看過鴈落葉下高城
海岫臨淮出江雲入楚平
定知先攬轡早晚望澄清

秋興

西苑迢迢隔絳河
遙瞻禁籞渺煙波
天臨偏甸開仙仗

日下高城

一作平蕪

散玉珂宮漏漫從三殿報
爐煙別向九

霄多龍池會有承恩處
誰唱清平第一歌

左國璣四首

國璣字舜齊祥符人弘治中舉人有南郭集

黃清

甫云左詩敏捷率意所向情景橫生昔有下筆成章之科斯其人矣但長於用才短於用思進而求之恐其易盡李時遠云中川空同內弟得之琢磨為深陳卧子云左君跌宕亦未成家

詩話田左竝稱詩皆麤鄙信魯衛也

郭桐岡樓宴集

華園倚崇墉飛觀凌白日招尋偶同游登陟遂閑逸逍

遙覽芳情結構轉幽密
亭深碧篠茂荷挺丹泉
溢虛曠周遠阡岑堯促
危膝迴飈灑窗牖明詠
散縹帙慕往歎睽離俯
來繼前述憂傷感蜉蝣局
促悲蟋蟀勿為逝波歎
且共賞瑤瑟

寒夜吟贈吳江主人

昏鐘夜半華月高
霜氣入室風蕭騷
主人下簾執明燭
玉壺瀉出香蒲萄
冰河赤鯉價重萬
洞庭黃柑初破苞
解我吳鉤佩著我
赤霜袍當杯更發
鷓鴣調意氣落魄

無辭勞白日營營苦多務喫飯梳頭日云暮不來清夜
與爾遭枉使黃金滿贏庫當年平樂宴賓客十千五千
更不顧如花少女勸酒歌醉沒西山月華素吳江主人
逸興清寒夜與爾相逢迎紅爐暖炙熏燄重不怕河水
凍萬層

野堂餞陳子之南都

我從夷門來送君金陵去野館離筵春晝晴楊花茫茫
幾千樹風吹亂撲金尊飛行人且解碧羅衣鳴箏送酒

勸君醉明日出門知者希

贈趙將軍

老將搖征旆提兵出漢家幾年閑豹略萬里鎮龍沙
路村村雨邊城處處花幕南無戰馬終日醉聞笳

孫一元

十七首

一元字太初不知何許人或曰安化王孫也自
號太白山人嘗西入華南入衡東登岳又南入
吳就昏於吳興施氏與劉麟吳琬陸崑龍霓稱

苔溪五隱有太白山人漫橐

顧華玉云太初於詩備極苦心所乏

天才耳

李獻吉

云山人有超軼才詩亦多憤

激悲壯之音

鄭繼之云太白詩悲壯奇崛感

激奮發而卒澤以沖和

劉元瑞云太初於詩

非唐以前則不顧又云太初詩主氣格有刮劇

胃腎之功豪殷近夫云山人詩傳寫萬物前無

古人凡可喜可愕可悲可嗔一以發之於詩豪

縱恣肆時出蹊徑

王元美云孫太初如雪夜

偏師間道入蔡又如鳴蜩伏蚓聲振月露體滯

泥壤王敬美云弘正以前風氣未開振騷創

雅實始李何蒹蘆中起而相角者一孫山人而

已山人詩可稱具體未見其止也穆敬甫云

太初詩神采秀發不染色相假與謫仙竝起一

時當互有長短顧玄言云山人五言得孟襄

陽幽處七言得張曲江曠處黃清甫云孫詩

語不循俗務在幽致寄託丘壑指顧煙霞宛然
有逸士風而內懷高度頗自標舉 陳卧子云
山人說跡塵外清放自居故
有俊調而鮮深思終近淺俗

詩話太初家本秦人不受空同圈束其詩亦不
盡本唐音觀其與杭東卿論詩作則知辨香所
向乃屬浩翁故有勃興黃九窮妙處空自知之
語劉元瑞墓表謂詩非唐以前則不顧未為太
初知己方山人太古讀其所寄詩云碧雲
行空月皎皎春風滿地花斑斑庶幾近之

自君之出矣 二首

自君之出矣冷煖何所依不能見君面但見篋中衣

自君之出矣生死那可不知不能保君身但保襖中兒

訪樵者

遠尋山中樵不識
山中路隔林伐木聲遙憶林深處不
晤竟空歸日墮西陵樹

秋夜同紫峽逸士雪江老僧輩十人宿南屏山中
誦逋仙夕寒山翠重秋淨鳥行高分韻賦詩予得
夕字

荒煙散不收殘山帶遙碧林鴉晚依依草雉時喁喁斜
光明不定居人掩荆柵竭來喜盍簪林下喜幽蹟屋屋

燈火青野蕨旋新摘豈無伏虎禪亦有飛鳧客愛此小
崑丘人世白雲隔願當抱奇幽炯言永終夕

陶淵明

淵明豪傑人出處亦有道昔讀荆軻詩彷彿見懷抱晉
室漸陵夷一官非所好劉裕乃何人天意亦草草歸來
卧潯陽甲子紀年號酒乃寓真情菊也見孤操

贈別王與時方伯

海中三花樹石上五粒松與子今有約相候尋其蹤褰

衣白雲杪時戲蒼精龍手把古苔篇還訪崑崙峰峰頂
嚙玄露長令有好客回首謝塵世莫教生秋蓬

漁父

野水平於席中流風力微江花迎日淨沙鳥背帆飛黃
帽為漁父青錢買釣磯只今鷗社裏投老願無違

晚霽

晚來雨初霽煙火隔林微一徑牛羊入孤村桑柘稀長
天下遠水積霧帶巖扉月黑聞人語溪南種樹歸

失鶴

只在秋江上孤蹤何所之花間扶杖處竹外聽泉時野
客來玄圃山僧寄紫芝此時還憶汝伴我夜吟詩

西爽亭會別周叅政楊顧二叅議

對酒山亭上清秋思更豪輕鷗動江色片雨帶林皋興
逐王司馬詩當何水曹分攜聊一笑日暮上漁舫

鄭繼之地官久不過湖上奉簡

怪爾狂吟客不過湖水濱寧遭官長罵莫得野人嗔雲

外鳥藤杖水邊白鷺巾相看只自好空送月華新

飲惠憲副北屏別墅

對酒清溪上聞歌杳靄間竹光酣晚日雲影動秋山好
鳥移時下名園盡日閒主人愛瀟散野客不知還

宿歸雲菴

沙晴竹碧鷗出飛野花候予開石扉暮雲卷雨日初落
木葉滿山風乍稀酒杯入夜意自好篝燈向人寒相依
窮幽覽勝乃吾事坐愛名山忘獨歸

草堂

溪上高秋雲木涼地偏人事不相妨
開門江日流書幌
背水秋花照草堂
塹北買田時未就
舍南種竹已成行
幽居自擬王官谷
藥裏書籤引興長

雜詠

夕陽沒中流
舟子不停櫓
風來未滿帆
望斷桃花浦

山中

來往不逢人家在山深處
獨鶴忽飛來風動月中樹

春日書事

欲晴未晴雲日黃
美人不來心獨傷
漫倚東風數春事
桃花梨花飛過牆

鄭善夫 二十二首

善夫字繼之閩縣人弘治乙丑進士除戶部主
事改禮部以諫南巡杖闕下尋乞歸用薦起南

京刑部改吏部郎中有少谷山人集

顧華玉云繼之氣秀

巖谷雖才韻勿充而古言精思霞映天表徐
子元云少谷師杜殊乏懼悚宛然一生愁也

楊用修云太初少谷兩家詩亦多雜宋人而鑒者莫悟 穆敬甫云鄭詩風骨稜然不深不俗

王元美云鄭繼之如水稜石骨質勁不華又如天寶父老談喪亂事皆實際時時感慨 王敬美云閩人家能咕嗶而不甚工詩國初林鴻高棟唐泰輩皆稱能詩號十才子然出張徐下遠甚無論季迪其後氣骨峻峻差堪旗鼓中原者僅一鄭善夫耳其詩雖多摸杜猶是邊徐薛王之亞 俞汝成云少谷才調有餘婉麗不足然奇氣具在雄思鬱然 顧玄言云驗封賦才英邁往往有新語 黃清甫云繼之才故沈鬱去杜為近過為摹仿幾喪其真壽陵之步亦可稱工奚必邯鄲也 謝在杭云鄭繼之一洗鉛華力追大雅然格擊百家獨宗少陵呻吟枯寂之語多而風人比興之義絕譬之時無春而遽秋人未少而先老才情未肆氣格變衰樂事未

陳聲淚俱下此在少陵為之已非得意之筆況效顰學步者哉 陳卧子云繼之雅質故補叙之言

獨長

詩話繼之在弘正間不襲李何餘論別開生面好盤硬語往往氣過其辭雖源出杜陵實有類山谷者集中感時之作可觀可怨頗不循人其論詩五言云大哉杜少陵苦心良在斯末流但叫噪古意漫莫知鳳鳥空中鳴衆禽反見啞蓋有獨立不遷之槩焉當時孫鄭竝稱孫非鄭敵朱鄭竝稱朱亦非鄭匹也

短歌行

驅

跨

一作

馬出郭門馬疾不俟鞭長跼叩

一作

挽

君馬聽我

歌一言涼風戒芳樹白露棲寒蟬君子有所思遠遊及
幽燕在家人所愛去家人所憐朝饔不及餐豈得戀膝
前下有黃口兒上有滄浪天今時方清廉盡室難遽遷
獨行多辛苦加餐以延年

曹潔躬云
奇矯無前

初離京邑留別諸同志

驅車遵城闐振策率廣路仰盼孤雲征俯見波流汴感
念平生歡豈以杯酒故羣居不自察

一作覺

相失增怨慕

川河引舟楫陵陸曠煙霧重覲難可尋努力敷襟素

發越州

生無冠組分碌碌守逆遭越南十二月盡室復遠遷故
國眇天末扁舟薄言旋閩中地氣暖可免絲與繇舊業
雖荒蕪尚有一頃田他鄉困寒饑胡為重留連且聞江
海熟已不憂荒年此州固信美旅寓豈其然盤餐未易
遘薪水亦費錢雖得山水玩顧非貧士便素癖厭人事
況乃居市廛毅然舍此去飄飄御風煙夜泊桐江雲朝
登富春山行復經武夷高招控鶴仙沆瀣亦可飽安能

逐鷗鳶跼跼禹跡裏衷情向誰宣

聞道

聞道今天子身封鎮國公家初營上谷臣得賀離宮鐵

券傳何急將軍氣盡雄郊牛凡五卜車駕想河東

鍾廣漢云

甚哉汲黯之戇也

即事

赤縣山河在黃沙道路長祇憂蕃部落不著舜衣裳寶轂猶深入金稍慮轉傷前車未為遠神武有英皇

早秋龍門舟中

艤子小於葉早秋江上行風波千古撼天地幾時平病
骨憐滄海凡才恥聖明不眠聞短吹故國亦飄零

送陳生赴韶州戎幕

月下棲烏樹天邊過鴈羣生涯隨逆旅幽獨倍憐君百
粵茲多難今時未尚文南遊得蠻府愁殺郝參軍

送蘇侍御從仁使蜀

驄馬今何去玄冥歲已殘風雲行劒閣鉦鼓動松潘事

在西戎部功虧舊將壇懷柔亦邊略要識聖恩寬

讀太初潯陽歌

青春寄我潯陽曲長路思君鸚鵡洲此日江湖須遠志
浮雲西北有高樓嵇康竟少神仙分尚子仍牽兒女憂
居洛何曾定蹤跡終南渭水入鄉愁

登御校場下望故宮

萬峰雲木鬱蒼蒼故壘仍存閱武場南渡關河雙眼盡
中原風物百憂傷尚傳草莽開黃屋想見龍蛇遶御牀

往事只今俱灑淚兩階干羽意何長

勝果寺秋懷

山寺行逢紅槿花江南風物望中賒
棘雲蘿月同秋事鴻鴈驚鷓亦歲華
多病茂陵仍去國長貧杜曲尚無家
白袍黃帽從吾好歸去滄洲問釣槎

卜居懷林待用司空

卜居為愛龍山好薜荔陰連湖上村
海日帆檣動書牖天風鵝鵲到柴門
清時定許潛夫遠散地還知靜者尊

聞道平生謝太傅東山卧席未教温

秋日病懷

南州木落晚

一作歲

蕭蕭薊野風煙萬里遥病後客心惟

藥物秋來人意滿雲霄平沙鴈帶三湘雨橫浦帆歸八

月潮搖落應悲楚公子不將舊業問

一作付

漁樵

李忠定祠

千秋祠廟對樵溪丞相回戈日向西江漢已浮龍馬去

風塵遺恨鷓鴣啼中原經略時何及北狩君臣路漸迷

三疏留君有東澈人情天運苦難齊

秋夜

七月欲盡天氣清殘月未上江猶明流螢渡水不一點
玄蟬咽秋無數聲獨客尚未送貧賤四方況是多甲兵
立罷西風夜無寐吳歛嫋嫋感人情

孤山寄太白山人

為問山人孫太初交情歲晚莫教疎孤山梅萼春相惱
滿地松苓日自鉏江夏肯容襦處士茂陵初卧馬相如

知君不廢苔溪釣書帛能無寄鯉魚

歲晏荅王時行

越王臺下草堂陰萬壽橋東流水心
天畔風雲新歲晏
霜前梅柳故園深黃巾亂後只茅屋
白社歸來無橘林
搖落最憐王水部近時生理戴朝簪

子夜變歌

我欲渡螺江螺女不可遇人知子夜來不知子夜去

柴門

涼月光不了照我芳桂叢白鳬如人長來往柴門東

武夷櫂歌


幔亭彩幄會仙靈紫霧濛濛薄太清奏罷人間可哀曲
鳳笙龍管杳無聲

櫂歌

青螺江頭游子吟黃金臺上秋雲深風塵一別一萬里
美人駕車傷我心

游丹青閣懷許黃門啓衷

風流不見許黃門文字丹青閣尚存最憐佳句車盤驛
黃犢青山何處村



明詩綜卷三十七